



URED ZA REVIZIJU INSTITUCIJA BIH
КАНЦЕЛАРИЈА ЗА РЕВИЗИЈУ ИНСТИТУЦИЈА БИХ
AUDIT OFFICE OF THE INSTITUTIONS OF BOSNIA AND HERZEGOVINA

www.revizija.gov.ba



IZVJEŠTAJ O OBAVLJENOJ FINANSIJSKOJ REVIZIJI

TUŽILAŠTVA

BOSNE I HERCEGOVINE

ZA 2025. GODINU



Sadržaj

I	MIŠLJENJE NEZAVISNOG REVIZORA.....	2
1.	MIŠLJENJE O FINANSIJSKIM IZVJEŠTAJIMA	2
2.	MIŠLJENJE O USKLAĐENOSTI.....	5
II	REZIME PREPORUKA DATIH ZA 2025. GODINU	7
III	IZVJEŠTAJ O OBAVLJENOJ REVIZIJI	7
1.	PREDMET I CILJ REVIZIJE	7
2.	KRITERIJI KORIŠTENI U REVIZIJI	8
3.	METODE I POSTUPCI REVIZIJE	8
4.	OCJENA REALIZACIJE PREPORUKA IZ PRETHODNIH IZVJEŠTAJA	9
5.	NADLEŽNOST, ORGANIZACIJA I RUKOVOĐENJE.....	9
6.	SISTEM INTERNIH KONTROLA.....	10
7.	FINANSIJSKI IZVJEŠTAJI	11
7.1.	Pregled prihoda i primitaka	11
7.2.	Pregled rashoda i izdataka iz budžeta	11
7.2.1.	Bruto plaće i naknade	12
7.3.	Bilans stanja	14
8.	ZAPOSŁJAVANJE I STATUS ZAPOSLENIH (ANGAŽOVANIH) OSOBA	15
8.1.	Zapošljavanje na određeno vrijeme	15
9.	JAVNE NABAVKE	15
10.	SUDSKI SPOROV I	15
11.	KOMENTARI TUŽILAŠTVA NA NACRT IZVJEŠTAJA	17
PRILOZI		17

I MIŠLJENJE NEZAVISNOG REVIZORA

Mišljenje nezavisnog revizora se daje na osnovu obavljene finansijske revizije koja obuhvata reviziju finansijskih izvještaja i, u vezi s istom, reviziju usklađenosti aktivnosti, finansijskih transakcija i informacija s relevantnim zakonima i drugim propisima.

1. MIŠLJENJE O FINANSIJSKIM IZVJEŠTAJIMA

Mišljenje

Obavili smo reviziju finansijskih izvještaja **Tužilaštva Bosne i Hercegovine** (u daljem tekstu: Tužilaštvo) koji obuhvataju: bilans stanja na 31.12.2025. godine, pregled prihoda, primitaka i finansiranja po ekonomskim kategorijama, pregled rashoda i izdataka po ekonomskim kategorijama, posebne podatke o plaćama i broju zaposlenih, pregled dinamike zapošljavanja, pregled stalnih sredstava u obliku stvari i prava, pregled kapitalnih ulaganja po vrstama i projektima, pregled doznaka iz tekuće rezerve budžeta, te analizu izvršenja budžeta – tekstualni dio, za godinu koja završava na taj dan.

Prema našem mišljenju, finansijski izvještaji Tužilaštva prikazuju istinito i fer, u svim značajnim aspektima, finansijsko stanje imovine, obaveza i izvora sredstava na 31.12.2025. godine, te prihode i izvršenje budžeta za godinu koja se završava na navedeni datum, u skladu s primjenjivim okvirom finansijskog izvještavanja.

Osnova za mišljenje

Reviziju smo obavili u skladu sa Zakonom o reviziji institucija Bosne i Hercegovine¹ i Međunarodnim standardima vrhovnih revizionih institucija (ISSAI)². Naše odgovornosti prema ISSAI standardima su detaljnije opisane u paragrafu *Odgovornosti revizora za reviziju finansijskih izvještaja*.

Nezavisni smo od Tužilaštva u skladu s etičkim zahtjevima koji su relevantni za našu reviziju prema ISSAI 130 – Etički kodeks i ispunili smo ostale etičke odgovornosti u skladu s tim zahtjevima.

Vjerujemo da su revizioni dokazi koje smo pribavili dovoljni i odgovarajući da osiguraju osnovu za naše mišljenje.

¹ Službeni glasnik BiH, broj 12/06

² Međunarodni standardi vrhovnih revizionih institucija (ISSAI) dio su Okvira profesionalnih objava Međunarodne organizacije vrhovnih revizionih institucija – IFPP okvira (INTOSAI Framework of Professional Pronouncements), koji čine tri nivoa objava: INTOSAI principi (INTOSAI-P), međunarodni standardi vrhovnih revizionih institucija (ISSAI) i INTOSAI smjernice (GUID).

Skretanje pažnje³

Ne izražavajući rezervu na mišljenje o finansijskim izvještajima, skrećemo pažnju na sljedeće:

- *značajan broj sudskih sporova koji za posljedicu mogu imati značajne potencijalne obaveze za budžet institucija Bosne i Hercegovine (tačka 10. Izvještaja).*

Odgovornosti rukovodstva za finansijske izvještaje

Rukovodstvo Tužilaštva je odgovorno za sastavljanje i fer prezentaciju finansijskih izvještaja u skladu s primjenjivim okvirom finansijskog izvještavanja na nivou institucija Bosne i Hercegovine tj. Zakonom o finansiranju institucija BiH, Pravilnikom o finansijskom izvještavanju institucija BiH i Pravilnikom o računovodstvu s računovodstvenim politikama i procedurama za korisnike budžeta institucija BiH. Ova odgovornost podrazumijeva i kreiranje, primjenu i održavanje internih kontrola koje su relevantne za sastavljanje i prezentaciju finansijskih izvještaja koji ne sadrže značajne pogrešne iskaze uslijed prijevare ili greške, odgovarajuća objelodanjanja relevantnih informacija u napomenama uz finansijske izvještaje, kao i odabir i primjenu odgovarajućih računovodstvenih politika i računovodstvenih procjena, koje su razumne u datim okolnostima.

Odgovornosti revizora za reviziju finansijskih izvještaja

Naši ciljevi su steći razumno uvjerenje o tome da li su finansijski izvještaji kao cjelina sačinjeni bez značajnog pogrešnog prikazivanja uslijed prijevare ili greške i izdati izvještaj nezavisnog revizora koji uključuje naše mišljenje. Razumno uvjerenje je visok nivo uvjerenja, ali nije garancija da će revizija obavljena u skladu s Međunarodnim standardima vrhovnih revizionih institucija uvijek otkriti značajno pogrešno prikazivanje kada ono postoji.

Pogrešni prikazi mogu nastati uslijed prijevare ili greške i smatraju se značajnim ako se razumno može očekivati da, pojedinačno ili zbirno, utiču na ekonomske odluke korisnika donijete na osnovu tih finansijskih izvještaja.

Kao sastavni dio revizije, u skladu s Međunarodnim standardima vrhovnih revizionih institucija, stvaramo profesionalne procjene i održavamo profesionalni skepticizam tokom revizije. Mi također:

- Prepoznamo i procjenjujemo rizike značajnog pogrešnog prikazivanja finansijskih izvještaja, zbog prijevare ili greške, oblikujemo i obavljamo revizione postupke kao reakciju na te rizike i pribavljamo revizione dokaze koji su dovoljni i primjereni da osiguraju osnovu za naše mišljenje. Rizik neotkrivanja značajnog pogrešnog prikazivanja nastalog uslijed prijevare je veći od rizika nastalog uslijed greške, jer prijevara može uključiti tajne

³ Paragraf kojim revizor skreće pažnju korisnicima izvještaja na pitanja koja su prezentovana ili objelodanjena u informacijama vezanim za predmet revizije, a koja su, prema revizorovoj profesionalnoj prosudbi, jako važna za razumijevanje takvih informacija od strane korisnika izvještaja; u revizionoj praksi ovaj paragraf se naziva još i 'isticanje pitanja'.

sporazume, krivotvorenje, namjerno izostavljanje, pogrešno prikazivanje ili zaobilaženje internih kontrola.

- Stičemo razumijevanje internih kontrola relevantnih za reviziju kako bismo oblikovali revizione postupke koji su primjereni u datim okolnostima, ali ne i za svrhu izražavanja mišljenja o uspješnosti internih kontrola.
- Ocjenjujemo primjerenost korištenih računovodstvenih politika i razumnost računovodstvenih procjena i povezanih objava koje je stvorilo rukovodstvo.
- Ocjenjujemo cjelokupnu prezentaciju, strukturu i sadržaj finansijskih izvještaja, uključujući i objave, kao i da li finansijski izvještaji odražavaju transakcije i događaje na kojima su zasnovani na način kojim se postiže fer prezentacija.

S rukovodstvom komuniciramo u vezi sa, između ostalih pitanja, planiranim djelokrugom i vremenskim rasporedom revizije i važnim nalazima revizije, uključujući i one koji se odnose na značajne nedostatke u internim kontrolama koji su otkriveni tokom naše revizije.

2. MIŠLJENJE O USKLAĐENOSTI

Mišljenje

U vezi s revizijom finansijskih izvještaja Tužilaštva za 2025. godinu, obavili smo i reviziju usklađenosti aktivnosti, finansijskih transakcija i informacija s relevantnim zakonima i drugim propisima.

Prema našem mišljenju, aktivnosti, finansijske transakcije i informacije Tužilaštva za 2025. godinu u skladu su, u svim značajnim aspektima, sa zakonima i drugim propisima koji su definisani kao kriteriji za datu reviziju.

Osnova za mišljenje

Reviziju usklađenosti smo obavili u skladu sa Zakonom o reviziji institucija Bosne i Hercegovine i ISSAI 4000 – Standard za reviziju usklađenosti. Naše odgovornosti prema ovom standardu su detaljnije opisane u paragrafu *Odgovornosti revizora za reviziju usklađenosti*.

Nezavisni smo od Tužilaštva u skladu s etičkim zahtjevima koji su relevantni za našu reviziju prema ISSAI 130 – Etički kodeks i ispunili smo ostale etičke odgovornosti u skladu s tim zahtjevima.

Vjerujemo da su revizioni dokazi koje smo pribavili dovoljni i odgovarajući da osiguraju osnovu za naše mišljenje.

Skretanje pažnje⁴

Ne izražavajući rezervu na mišljenje o usklađenosti, skrećemo pažnju na sljedeće:

- *Pravilnik za utvrđivanje kriterija za razvrstavanje radnih mjesta stručnog osoblja u kategorije i platne razrede nije usklađen sa odredbama Zakona o plaćama i drugim naknadama u sudskim i tužilačkim institucijama na nivou Bosne i Hercegovine (tačka 7.2.1. Izvještaja).*

Odgovornosti rukovodstva za usklađenost

Pored odgovornosti za sastavljanje i fer prezentaciju finansijskih izvještaja, rukovodstvo Tužilaštva je također odgovorno da osigura da su aktivnosti, finansijske transakcije i informacije u skladu s propisima kojima su regulisane i potvrđuje da je tokom fiskalne godine osiguralo namjensko, svrsishodno i zakonito korištenje raspoloživih sredstava za ostvarivanje utvrđenih ciljeva, te ekonomično, efikasno i efektivno funkcionisanje sistema finansijskog upravljanja i kontrole.

⁴ Paragraf kojim revizor skreće pažnju korisnicima izvještaja na pitanja koja su prezentovana ili objelodanjena u informacijama vezanim za predmet revizije, a koja su, prema revizorovoj profesionalnoj prosudbi, jako važna za razumijevanje takvih informacija od strane korisnika izvještaja; u revizionoj praksi ovaj paragraf se naziva još i 'isticanje pitanja'.

Odgovornosti revizora za reviziju usklađenosti

Pored odgovornosti da izrazimo mišljenje o finansijskim izvještajima, naša odgovornost podrazumijeva i izražavanje mišljenja o tome da li su aktivnosti, finansijske transakcije i informacije, u svim značajnim aspektima, u skladu sa zakonima i drugim propisima kojima su regulisane. Odgovornost revizora uključuje obavljanje procedura, kako bi pribavili revizione dokaze o tome da li se sredstva koriste za odgovarajuće namjene i da li je poslovanje Tužilaštva, prema definisanim kriterijima, usklađeno s relevantnim zakonima i drugim propisima. Procedure podrazumijevaju procjenu rizika od značajnih neusklađenosti sa zakonima i propisima koji regulišu poslovanje subjekta revizije. Također, naša odgovornost podrazumijeva i ocjenu finansijskog upravljanja, funkcije interne revizije i sistema internih kontrola.

Sarajevo, 8. 7. 2026. godine

GENERALNI REVIZOR

Hrvoje Tvrtković, v. r.

**ZAMJENIK
GENERALNOG REVIZORA**

Nedžad Hajtić, v. r.

**ZAMJENICA
GENERALNOG REVIZORA**

Neda Močević

II REZIME PREPORUKA DATIH ZA 2025. GODINU

U Izvještaju o obavljenoj finansijskoj reviziji za 2025. godinu date su tri preporuke (jedna nova i dvije ponovljene⁵). Sve date preporuke se odnose na usklađenost. U tabeli koja slijedi prikazan je rezime datih preporuka, dok su detaljni nalazi prezentovani po procesima u okviru pojedinačnih tačaka Izvještaja.

Tabela 1. Rezime datih preporuka za 2025. godinu

Br. prep.	Tekst preporuke	Status preporuke
1	Tužilaštvo je dužno Pravilnikom o unutrašnjoj organizaciji jasno utvrditi kriterije za razvrstavanje osoblja na stručno i administrativno-tehničko u smislu odredbi Zakona o plaćama i drugim naknadama u sudskim i tužilačkim institucijama na nivou BiH.	P
2	Tužilaštvo je dužno da odredbe Pravilnika o utvrđivanju kriterija za razvrstavanje radnih mjesta stručnog osoblja u kategorije i platne razrede uskladi sa odredbama Zakona o plaćama i drugim naknadama u sudskim i tužilačkim institucijama na nivou BiH.	P
3	Tužilaštvo je dužno postupati u skladu s propisima koji regulišu radnopravni status zaposlenih u institucijama BiH.	N

Status: N-nova, P-ponovljena

III IZVJEŠTAJ O OBAVLJENOJ REVIZIJI

Ured za reviziju institucija Bosne i Hercegovine (u daljem tekstu: Ured za reviziju) obavio je finansijsku reviziju za 2025. godinu koja obuhvata reviziju finansijskih izvještaja Tužilaštva i, u vezi s istom, reviziju usklađenosti.

U Izvještaju o obavljenoj finansijskoj reviziji Tužilaštva za 2025. godinu su, pored mišljenja nezavisnog revizora i rezimea datih preporuka za 2025. godinu, prezentovani predmet i cilj revizije, korišteni kriteriji, kao i metode i postupci revizije. Također, ocijenjena je realizacija preporuka iz prethodnih izvještaja i prezentovani su detaljni revizorski nalazi i date preporuke.

1. PREDMET I CILJ REVIZIJE

Predmet revizije su finansijski izvještaji Tužilaštva za 2025. godinu i usklađenost aktivnosti, finansijskih transakcija i informacija s relevantnim zakonima i drugim propisima.

Cilj je da se izrazi mišljenje o tome jesu li finansijski izvještaji pouzdani i odražavaju li bilansi u cijelosti rezultate poslovanja. Također, cilj revizije je procijeniti primjenjuje li rukovodstvo institucije zakone i propise, i koristi li sredstva za odgovarajuće namjene, te ocijeniti finansijsko upravljanje, sistem internih kontrola i funkciju interne revizije.

⁵ Nerealizovane preporuke iz prethodnog perioda su, nakon utvrđenog činjeničnog stanja, ponovljene.

S obzirom na to da se revizija obavlja ispitivanjem na bazi uzorka i da postoje inherentna ograničenja u računovodstvenom sistemu i sistemu internih kontrola, pojedina značajna pogrešna prikazivanja mogu ostati neotkrivena.

2. KRITERIJI KORIŠTENI U REVIZIJI

Revizija finansijskih izvještaja i revizija usklađenosti podrazumijevaju proces objektivnog prikupljanja i procjenjivanja dokaza, kako bi se utvrdilo da li su predmeti revizije, tj. finansijski izvještaji, kao i aktivnosti, finansijske transakcije i informacije, usklađeni s odgovarajućim kriterijima koji su sadržani u zakonima i drugim propisima. Kriteriji predstavljaju uporedne parametre koji se koriste kako bi se dala ocjena predmeta revizije.

Naime, za obavljanje finansijske revizije korišteni su sljedeći kriteriji:

- Zakon o budžetu institucija BiH i međunarodnih obaveza BiH za 2025. godinu
- Zakon o finansiranju institucija BiH
 - Pravilnik o računovodstvu s računovodstvenim politikama i procedurama za korisnike budžeta institucija BiH
 - Pravilnik o finansijskom izvještavanju institucija BiH
 - Instrukcije o privremenom finansiranju institucija BiH za period januar – mart, april – juni, juli – septembar i oktobar – decembar 2025. godine
- Zakon o plaćama i naknadama u institucijama BiH i podzakonski akti
- Zakon o plaćama i drugim naknadama u sudskim i tužilačkim institucijama na nivou BiH
- Zakon o porezu na dohodak i Zakon o doprinosima (FBiH i RS)
- Zakon o javnim nabavkama i podzakonski akti
- Zakon o državnoj službi u institucijama BiH i podzakonski akti
- Zakon o radu u institucijama BiH i podzakonski akti
- Zakon o upravi i podzakonski akti
- Zakon o reviziji institucija BiH
- Zakon o Tužilaštvu BiH.

3. METODE I POSTUPCI REVIZIJE

Finansijska revizija je provedena u skladu s donesenim godišnjim planom u dvije faze, odnosno obavljanjem prethodne i završne revizije u periodu između oktobra 2025. godine i maja 2026. godine. U skladu s predmetom finansijske revizije i metodologijom rada Ureda za reviziju koja se bazira na Međunarodnim standardima vrhovnih revizionih institucija (ISSAI), sagledana je prezentovana dokumentacija i informacije o poslovanju Tužilaštva, utvrđena su područja rizika i ocijenjeno je funkcionisanje sistema internih kontrola po pojedinim procesima radi određivanja revizionog pristupa. Na bazi uzorka je izvršen uvid u knjigovodstvenu dokumentaciju o nastalim poslovnim događajima evidentiranim u poslovnim knjigama Tužilaštva. Ispitana je dosljednost primjene zakonskih propisa, te pravila, procedura i drugih internih akata koji su vezani za finansijsko poslovanje Tužilaštva. Obavljeni su razgovori s rukovodstvom Tužilaštva i drugim zaposlenicima u cilju pribavljanja obrazloženja odgovornih osoba u vezi s poslovnim događajima koji su bili predmetom revizije.

4. OCJENA REALIZACIJE PREPORUKA IZ PRETHODNIH IZVJEŠTAJA

U prethodnim izvještajima o obavljenoj finansijskoj reviziji Tužilaštva Ured za reviziju je dao preporuke u cilju otklanjanja uočenih nepravilnosti, nedostataka i slabosti.

Tokom obavljanja revizije za 2025. godinu ocijenili smo da je Tužilaštvo od ukupno četiri prethodno date preporuke, realizovalo jednu, dvije preporuke nisu realizovane, dok jedna preporuka nije mogla biti ocijenjena u revidiranom periodu.

U narednoj tabeli prikazan je pregled ocjene realizacije prethodno datih preporuka.

Tabela 2. Detaljan pregled ocjene realizacije prethodno datih preporuka

Broj prep.	Ocjena realizacije preporuke iz prethodnih izvještaja	Status
1/2024	Tužilaštvo nije Pravilnikom o unutrašnjoj organizaciji jasno utvrdilo kriterije za razvrstavanje osoblja na stručno i administrativno-tehničko u smislu odredbi Zakona o plaćama i drugim naknadama u sudskim i tužilačkim institucijama na nivou BiH.	✗
2/2024	Tužilaštvo je fondovsku klasifikaciju rashoda vršilo u skladu sa Pravilnikom o računovodstvu s računovodstvenim politikama i procedurama za korisnike budžeta institucija BiH.	✓
3/2024	Odredbe Pravilnika o utvrđivanju kriterija za razvrstavanje radnih mjesta stručnog osoblja u kategorije i platne razrede nisu usklađene sa odredbama Zakona o plaćama i drugim naknadama u sudskim i tužilačkim institucijama na nivou BiH.	✗
4/2023	Tužilaštvo ni u 2025. godini nije planiralo niti provodilo proceduru nabavke vozila tako da datu preporuku da se tehnička specifikacija vozila sačinjava na nediskriminišući način nismo mogli ocijeniti u revidiranom periodu.	Ⓜ

Status: ✓ realizovana preporuka⁶, ● preporuka čija je realizacija u toku⁷, ✗ nerealizovana preporuka⁸, Ⓜ preporuka koja nije mogla biti ocijenjena u revidiranom periodu⁹.

5. NADLEŽNOST, ORGANIZACIJA I RUKOVOĐENJE

Nadležnost i područje djelovanja Tužilaštva propisani su Zakonom o Tužilaštvu Bosne i Hercegovine¹⁰. Tužilaštvo je organ nadležan za provođenje istraga za krivična djela za koja je nadležan Sud BiH, nadležan je za primanje zahtjeva za međunarodnu pravnu pomoć u krivičnim stvarima, u skladu sa zakonima, multilateralnim i bilateralnim sporazumima i konvencijama, dok su posebni odjeli nadležni za preduzimanje zakonom određenih mjera za ispitivanje i gonjenje počinilaca krivičnih djela ratnih zločina, organizovanog kriminala, privrednog kriminala i korupcije predviđenih zakonom, kada je u navedenim zakonima za ta djela predviđena nadležnost Suda Bosne i Hercegovine.

Tužilaštvom rukovodi glavni tužilac kojeg je, 20.10.2022. godine, imenovalo Visoko sudsko i tužilačko vijeće BiH. Glavni tužilac ima četiri zamjenika koje je, također, imenovao Visoko

⁶ Realizovane su aktivnosti navedene u preporuci.

⁷ U toku je realizacija aktivnosti te stoga u ovom izvještaju nije data nova preporuka, ali je dat opis stanja i provedenih aktivnosti.

⁸ Nisu preduzimate aktivnosti na realizaciji preporuke te je stoga u ovom izvještaju ponovljena preporuka za predmetni proces.

⁹ Preporuka nije mogla biti ocijenjena u ovom ciklusu revizije, ali će biti ocijenjena kad se za to steknu uslovi.

¹⁰ Službeni glasnik BiH, broj 49/09 i 97/09

sudsko i tužilačko vijeće BiH. Glavnom tužiocu i zamjenicima glavnog tužioca mandat traje šest godina uz mogućnost ponovnog imenovanja.

Zakonom je definisano da se unutrašnja organizacija Tužilaštva, broj administrativno-tehničkog osoblja i uslovi obavljanja tih poslova reguliše pravilnikom Tužilaštva, koji donosi glavni tužilac uz odobrenje Kolegija tužilaca i Visokog sudskog i tužilačkog vijeća BiH. Na snazi je Pravilnik iz 2013. godine koji je mijenjan i dopunjavan šest puta, posljednji put 2022. godine¹¹.

Prema odredbama Pravilnika o unutrašnjoj organizaciji, Tužilaštvo čine tužilački odjeli (Posebni odjel za ratne zločine i Posebni odjel za organizovani kriminal, privredni kriminal i korupciju) i Uprava Tužilaštva. Odredbom člana 17. stav 1. tačka 25) Zakona o Visokom sudskom i tužilačkom vijeću BiH, propisano je da potreban broj tužilaca određuje Visoko sudsko i tužilačko vijeće BiH na osnovu dostavljenog prijedloga, odnosno mišljenja glavnog tužioca. Odlukom Visokog sudskog i tužilačkog vijeća BiH, utvrđeno je da će ukupan broj tužilaca u Tužilaštvu biti 63. U upravi Tužilaštva sistematizovano je ukupno 349 radnih mjesta za obavljanje stručnih i administrativno-tehničkih poslova. Za svako radno mjesto utvrđen je opis poslova te uslovi za obavljanje poslova u pogledu stepena i vrste stručne spreme i dodatnih kvalifikacija i vještina te godina radnog iskustva.

Budući da Pravilnikom o unutrašnjoj organizaciji nisu jasno utvrđeni kriteriji i principi za kategorizaciju osoblja na stručno osoblje u smislu odredbi Zakona o plaćama i drugim naknadama u sudskim i tužilačkim institucijama na nivou BiH, Tužilaštvu je prethodnih godina preporučeno da izvrši izmjene Pravilnika o unutrašnjoj organizaciji u cilju stvaranja preduslova za donošenje kriterija za razvrstavanje radnih mjesta stručnog osoblja u kategorije i platne razrede u skladu sa važećim propisima. Kolegij Tužilaštva je u maju 2023. godine donio zaključak o formiranju radne grupe za izmjenu Pravilnika o unutrašnjoj organizaciji radi provođenja datih preporuka revizije, o čemu nas je Tužilaštvo obavijestilo u svom odgovoru o preduzetim aktivnostima po izvještaju revizije za 2022. godinu¹², međutim, izmjene Pravilnika još uvijek nisu izvršene.

PREPORUKA 1

Tužilaštvo je dužno Pravilnikom o unutrašnjoj organizaciji jasno utvrditi kriterije za razvrstavanje osoblja na stručno i administrativno-tehničko u smislu odredbi Zakona o plaćama i drugim naknadama u sudskim i tužilačkim institucijama na nivou BiH.

6. SISTEM INTERNIH KONTROLA

Tužilaštvo je odgovorno za kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja i usklađenost poslovanja sa zakonima i drugim propisima.

Finansijsko upravljanje i kontrola: Zakon o finansiranju institucija BiH¹³ uređuje oblast finansijskog upravljanja i kontrole. Ovim zakonom finansijsko upravljanje i kontrola definisano je kao sveobuhvatan sistem politika, procedura i aktivnosti koji uspostavlja i za koji je odgovoran

¹¹ Službeni glasnik BiH 74/22 – Službeni prečišćeni tekst

¹² Informacija o preduzetim aktivnostima po nalazima revizije, broj A-415/22 od 11.8.2023. godine

¹³ Službeni glasnik BiH, broj 61/04, 49/09, 42/12, 87/12, 32/13, 38/22 i 44/25

rukovodilac institucije. Sistem finansijskog upravljanja i kontrole zasniva se na upravljanju rizicima i pruža razumno uvjeravanje da će ciljevi institucije biti ostvareni na pravilan, ekonomičan, efikasan i efektivan način. Tužilaštvo je donijelo osnovne dokumente za uspostavljanje sistema finansijskog upravljanja i kontrole u skladu sa Zakonom o finansiranju institucija BiH, Priručnikom za finansijsko upravljanje i kontrolu i Smjernicama za provođenje procesa upravljanja rizicima u institucijama BiH.

Mape poslovnih procesa i registar rizika su ažurirani u toku 2025. godine. Rukovodstvu je dostavljen izvještaj o preduzetim aktivnostima vezano za implementaciju finansijskog upravljanja i kontrole za 2025. godinu. Tužilaštvo je Centralnoj harmonizacijskoj jedinici Ministarstva finansija i trezora BiH¹⁴ dostavilo Godišnji izvještaj o sistemu finansijskog upravljanja i kontrole za 2025. godinu.

Funkcionisanje sistema internih kontrola: Ocjena sistema internih kontrola je zasnovana na procesima koji su revidirani u okviru revizije finansijskih izvještaja i revizije usklađenosti. Na osnovu provedene revizije utvrdili smo da sistem internih kontrola u Tužilaštvu u dijelu zapošljavanja na određeno vrijeme nije na zadovoljavajućem nivou.

7. FINANSIJSKI IZVJEŠTAJI

Tužilaštvo je sačinilo Godišnji finansijski izvještaj za 2025. godinu i dostavilo ga nadležnim organima i institucijama u skladu s važećim propisima i u utvrđenom roku.

Analizom bilješki uz finansijske izvještaje konstatovano je da su sačinjeni prema Pravilniku o finansijskom izvještavanju institucija BiH¹⁵.

7.1. Pregled prihoda i primitaka

Ukupno ostvareni prihodi i primici po ekonomskim kategorijama, u periodu od 1.1. do 31.12.2025. godine, iskazani su u iznosu od 28.596 KM, a evidentirani na poziciji ostalih prihoda. Značajniji prihod ostvaren je na osnovu uplata sredstava (16.940 KM) po osnovu pravosnažne sudske presude za krivično djelo pronevjera u službi, povrat otuđenog novca iz blagajne.

Pregled prihoda i primitaka prikazan je u Prilogu I Izvještaja.

7.2. Pregled rashoda i izdataka iz budžeta

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2025. godinu¹⁶, Tužilaštvu su odobrena sredstva u ukupnom iznosu od

¹⁴ Navedena jedinica ima obavezu sačinjavati i Vijeću ministara BiH dostavljati konsolidovani godišnji izvještaj o sistemu finansijskog upravljanja i kontrole u institucijama BiH koji sadrži informacije o stepenu uspostavljanja, napretku, stanju i aktivnostima koje su u izvještajnom periodu realizovane u oblasti razvoja sistema internih finansijskih kontrola, kao i o planovima za budući razvoj sistema internih finansijskih kontrola u institucijama BiH.

¹⁵ Službeni glasnik BiH, broj 14/26

¹⁶ Službeni glasnik BiH, broj 70/25

22.388.000 KM (tekući izdaci 22.268.000 KM i kapitalni izdaci 120.000 KM)¹⁷. Također, spomenutim zakonom je odobreno 237 zaposlenih u Tužilaštvu.

Tokom godine izvršena su usklađivanja budžeta koja se odnose na sljedeće:

- sredstva odobrena iz tekuće rezerve na osnovu Odluke Vijeća ministara BiH za isplatu jednokratne novčane pomoći zaposlenim u institucijama BiH¹⁸ u iznosu od 367.966 KM (detaljnije u tački 7.2.1. Izvještaja);
- sredstva naplaćena od osiguravajućeg društva za osigurano službeno vozilo¹⁹ (2.069 KM) i
- sredstva novčanih donacija prenesena iz prethodnog perioda u iznosu od 342.623 KM.

Prema navedenom, Tužilaštvo je u 2025. godini raspolagalo sredstvima u ukupnom iznosu od 23.100.658 KM.

Tužilaštvo je izvršilo prestrukturisanje rashoda budžeta koje je odobrilo Ministarstvo finansija i trezora BiH. Prestrukturisanje rashoda budžeta je izvršeno u ukupnom iznosu od 400.000 KM. Promjena strukture rashoda je izvršena umanjjenjem raspoloživih sredstava na poziciji bruto plaća, u korist sredstava namijenjenih za troškove ekshumacije (280.000 KM) koju je teško predvidjeti zbog prirode troška, kao i za povećanje raspoloživih sredstava za tekuće održavanje (100.000 KM) i za troškove električne energije i komunalnih usluga (20.000 KM).

U pregledu rashoda i izdataka po ekonomskim kategorijama – zbirno, u periodu od 1.1. do 31.12.2025. godine, ukupno ostvareni rashodi iskazani su u iznosu od 21.983.199 KM, što je za 1.117.459 KM manje u odnosu na raspoloživi (korigovani) budžet za 2025. godinu.

Vrijednosno značajni rashodi odnose se na: bruto plaće i naknade (17.859.049 KM)²⁰, naknade troškova zaposlenih (2.077.938 KM), ugovorene i druge posebne usluge (986.956 KM) i novčane donacije (317.571 KM).

Pregled rashoda i izdataka iz budžeta prikazan je u Prilogu II Izvještaja.

U daljem tekstu navodimo nalaze revizije, kao i određena objelodanjivanja činjenica o značajnim rashodima realizovanim u 2025. godini.

7.2.1. Bruto plaće i naknade

Revizijom izdataka u okviru pozicije bruto plaća utvrđene su sljedeće nepravilnosti i nedostaci:

Ukupni izdaci za bruto plaće i naknade iz plaća na 31.12.2025. godine iskazani su u iznosu od 17.859.049 KM, od čega su neto plaće iskazane u iznosu od 10.554.540 KM. Analizirajući

¹⁷ Do usvajanja budžeta za 2025. godinu, Tužilaštvo je raspolagalo sredstvima odobrenim prema pojedinačnim instrukcijama o privremenom finansiranju institucija BiH za period januar – mart 2025. godine, broj: 05-16-2-7582-1/24 od 17.12.2024. godine, za period april – juni 2025. godine, broj: 05-02-2-2225-1/25 od 24.3.2025. godine, period juli – septembar 2025. godine, broj: 05-02-2-4036-1/25 od 20.6.2025. godine i period oktobar – decembar 2025. godine, broj: 05-02-2-5606-1/25 od 24.9.2025. godine koje je donio ministar finansija i trezora Bosne i Hercegovine.

¹⁸ Službeni glasnik BiH, broj 75/25

¹⁹ Evidentiranje prihoda izvršeno je na osnovu Instrukcije o načinu realizacije i knjigovodstvenog evidentiranja poslovnih promjena servisiranja osiguranih motornih vozila, akt Ministarstva finansija i trezora BiH broj: 08-2-2-2625-1/23 od 25.3.2022. godine.

²⁰ Prosječan broj zaposlenih u 2025. godini za koje su isplaćene bruto plaće bio je 227.

obračun i isplatu plaća može se konstatovati da iskazano stanje na kontu neto plaća nije u cijelosti realizovano, jer Ministarstvo finansija i trezora svaki mjesec obavijesti Tužilaštvo da su obračunate neto plaće za dvije osobe vraćene, jer su računi zaposlenih neaktivni. Kao razlog za to navodi se da su zaposleni na crnoj listi američke ambasade, te da nema mogućnosti da se izvrši uplata sredstava. Prema internoj evidenciji Tužilaštva, ukupno neisplaćene neto plaće i naknade zaposlenih po ovom osnovu su 185.882 KM. Tužilaštvo je informisano od strane Ministarstva finansija i trezora BiH da ova neisplaćena sredstva Ministarstvo knjigovodstveno evidentira na konto 391 311 – Ostala razgraničenja Glavne knjige Trezora.

Obračun i isplata plaća i naknada plaće za tužioce i stručno osoblje se vrši na osnovu Zakona o plaćama i naknada u sudskim i tužilačkim institucijama BiH, dok se za zaposlenike obračun plaća vrši u skladu sa Zakonom o plaćama i naknadama zaposlenih u institucijama BiH. Tužilaštvo je na 31.12.2025. godine imalo ukupno 217 zaposlenih od čega su 173 osobe stručno osoblje (48 tužilaca i 125 ostalo stručno osoblje) i 44 osobe administrativno-tehničko osoblje.

Uspostavljeni model obračuna plaća i naknada je složen zbog primjene dva zakona o plaćama i drugim naknadama. Tokom revizije je usmjerena pažnja na proces obračuna plaća i naknada troškova zaposlenih u Tužilaštvu zbog značajnosti iznosa, kontinuiranog uvećanja kroz godine i složenosti važećeg zakonskog okvira te potrebe osiguranja transparentnog i ravnopravnog tretmana zaposlenih u institucijama BiH.

Zakonom o plaćama i drugim naknadama u sudskim i tužilačkim institucijama na nivou BiH, članom 6. regulisano je da se osnovna mjesečna plaća neće povećavati sve dok prosječna neto plaća u BiH izračunata za kalendarsku godinu ne dostigne ili ne prijeđe iznos od 800 KM. Počev od godine koja uslijedi nakon godine u kojoj prosječna mjesečna neto plaća u BiH izračunata za kalendarsku godinu po prvi put dostigne ili prijeđe iznos od 800 KM, osnovna mjesečna plaća će se godišnje korigovati za procenat povećanja prosječne mjesečne neto plaće u BiH. U 2025. godini je zabilježeno povećanje plaća od 9,4% u odnosu na prethodnu godinu, u skladu sa Zakona o plaćama i drugim naknadama u sudskim i tužilačkim institucijama na nivou Bosne i Hercegovine.

Tužilaštvo je u julu 2021. godine usvojilo Pravilnik za utvrđivanje kriterija za razvrstavanje radnih mjesta stručnog osoblja u kategorije i platne razrede.²¹ Ovim pravilnikom je propisano da se stručnim osobljem smatraju zaposleni sa visokom stručnom spremom čija su radna mjesta utvrđena Pravilnikom o unutrašnjoj organizaciji Tužilaštva, te da se njihove plaće obračunavaju u skladu sa Zakonom o plaćama i drugim naknadama u sudskim i tužilačkim institucijama na nivou Bosne i Hercegovine. Međutim, navedeni pravilnik nije usklađen sa odredbama Zakona o plaćama i drugim naknadama u sudskim i tužilačkim institucijama na nivou Bosne i Hercegovine, uprkos preporukama revizije iz prethodnih godina.

Navedenim pravilnikom utvrđeni su kriteriji za razvrstavanje radnih mjesta stručnog osoblja Tužilaštva u kategorije i platne razrede prema rasponima plaća iz člana 17. stav 1. tačaka e), f) i g) Zakona o plaćama i drugim naknadama u sudskim i tužilačkim institucijama na nivou BiH, iako se tačke e) i f) ne odnose na Tužilaštvo. Zakon, kada je riječ o Tužilaštvu, osim tužilačkih funkcija i pozicije sekretara, predviđa samo radna mjesta stručnih saradnika/pomoćnika

²¹ Pravilnik broj A-374/18 od 12.07.2021. godine i izmjene i dopune br. A-374/18-1 od 10.03.2022. i A-374/18-2 od 29.09.2022. godine

tužilaca iz tačke g), dok druge kategorije stručnog osoblja (stručni savjetnici, pravni savjetnici i dr.) ne prepoznaje, iako su sistematizovane važećim pravilnikom o unutrašnjoj organizaciji.

Tužilaštvo donošenje ovog pravilnika obrazlože potrebom ujednačavanja kriterija i prakse u razvrstavanju stručnog osoblja kako unutar Tužilaštva tako i u odnosu na druge pravosudne institucije na nivou BiH, imajući u vidu pokrenute sudske sporove. Međutim, potrebno je napomenuti da su plaće „ostalog“ stručnog osoblja u ostalim pravosudnim institucijama definisane članom 17. stavom 1. tačkama e), f) i g) Zakona o plaćama i drugim naknadama u sudskim i tužilačkim institucijama na nivou BiH, dok su plaće stručnog osoblja kada je u pitanju Tužilaštvo, definisane u članu 17. stav 1, ali samo u tački g).

PREPORUKA 2

Tužilaštvo je dužno da odredbe Pravilnika o utvrđivanju kriterija za razvrstavanje radnih mjesta stručnog osoblja u kategorije i platne razrede uskladi sa odredbama Zakona o plaćama i drugim naknadama u sudskim i tužilačkim institucijama na nivou BiH.

Nadalje, Tužilaštvu su tokom 2025. godine odobrena sredstva iz tekuće rezerve u iznosu od 367.966 KM na osnovu Odluke o odobravanju sredstava tekuće rezerve za isplatu jednokratne novčane pomoći zaposlenim u institucijama BiH. Sredstva su odobrena za isplatu bruto naknade za sve zaposlene u Tužilaštvu. Prema obrazloženju Odluke Vijeća ministara BiH, sredstva su osigurana radi zaštite materijalnog položaja zaposlenih u institucijama BiH u okolnostima privremenog finansiranja i neblagovremenog usvajanja budžeta institucija BiH i međunarodnih obaveza BiH za 2025. godinu. Iako se svrha donošenja navedene odluke, ogleda u ublažavanju posljedica neblagovremenog usvajanja budžeta za 2025. godinu zbog čega se isplata plaće zaposlenim u institucijama BiH tokom 2025. godine vršila na osnovu osnovice iz 2024. godine (600 KM), umjesto osnovice iz 2025. godine (631,50 KM), a zbog čega su zaposleni u tom periodu ostvarili umanjena primanja, jednokratna novčana pomoć je isplaćena i kategorijama zaposlenih u Tužilaštvu²² čija primanja nisu bila direktno uslovljena usvajanjem budžeta za 2025. godinu. Iako je sadržaj odluke mogao ostaviti prostor za različita tumačenja, iz njenog obrazloženja ne proizlazi namjera priznavanja predmetnog prava kategorijama zaposlenih u Tužilaštvu koje nisu bile pogođene posljedicama neusvajanja budžeta u pogledu obračuna plaća.

7.3. Bilans stanja

U bilansu stanja na 31.12.2025. godine iskazana su ukupna sredstva u iznosu od 3.353.406 KM. Ukupne obaveze s izvorima sredstava iskazane su u iznosu od 3.689.171 KM. Značajne stavke bilansa stanja odnose se na neotpisanu vrijednost stalnih sredstava (3.338.834 KM), kratkoročne tekuće obaveze (326.672 KM) i kratkoročna potraživanja (11.521 KM).

Bilans stanja prikazan je u Prilogu III Izvještaja.

²² Za 174 osobe koje su razvrstane u kategoriju stručnog osoblja, a koje primaju plaću u skladu sa Zakonom o plaćama i drugim naknadama u sudskim i tužilačkim institucijama na nivou Bosne i Hercegovine,

8. ZAPOSŁJAVANJE I STATUS ZAPOSLENIH (ANGAŽOVANIH) OSOBA

8.1. Zapošljavanje na određeno vrijeme

Tužilaštvo je tokom 2025. godine, na osnovu ugovora o radu na određeno vrijeme, zaposlilo jednu osobu na period od dva i po mjeseca, bez raspisivanja javnog oglasa. Ugovor o radu na određeno vrijeme do tri mjeseca zaključen je sa osobom kojoj je radni odnos prestao po osnovu navršenih 40 godina staža osiguranja, a u skladu s članom 71. stav (1) tačka a) Zakona o radu u institucijama Bosne i Hercegovine. Imajući u vidu da Zakon o radu u institucijama BiH propisuje prestanak radnog odnosa po sili zakona u navedenom slučaju, a da istim zakonom nije izričito uređena mogućnost ponovnog zasnivanja radnog odnosa sa osobom kojoj je radni odnos prestao po tom osnovu, mišljenja smo da ovakvo angažovanje nema zakonsku osnovu. Također, ovakvo postupanje stvara pravnu nesigurnost u primjeni propisa kojima je uređen radnopravni status zaposlenika u institucijama BiH, te je praksa ponovnog angažovanja osoba koje su ispunile uslove za penzionisanje u javnom sektoru neprihvatljiva.

PREPORUKA 3

Tužilaštvo je dužno postupati u skladu s propisima koji regulišu radnopravni status zaposlenih u institucijama BiH.

9. JAVNE NABAVKE

Tužilaštvo je donijelo i objavilo Plan javnih nabavki za 2025. godinu, kako je propisano Zakonom o javnim nabavkama²³. Prema prezentovanim podacima²⁴, Tužilaštvo je u 2025. godini provelo jedan otvoreni postupak ukupne vrijednosti 68.376 KM bez PDV-a²⁵, 11 konkurentskih zahtjeva ukupne vrijednosti 272.024 KM, te tri postupka u skladu s Aneksom II ukupne procijenjene vrijednosti 489.880 KM²⁶. Osim navedenog, Tužilaštvo je putem direktnih sporazuma realizovalo nabavke u vrijednosti od 118.180 KM. U revidiranim postupcima javnih nabavki nisu uočeni značajni nedostaci.

10. SUDSKI SPOROVI

Prema pregledu aktivnih sudskih sporova koje je sačinilo Tužilaštvo, pred sudovima u Bosni i Hercegovini protiv Tužilaštva vode se 84 postupka, ukupne vrijednosti potraživanja 6.392.517 KM. U toku 2025. godine, zaprimljeno je novih 30 tužbenih zahtjeva. Tužbeni zahtjevi najvećim djelom se odnose na potraživanja prava iz radnog odnosa, utvrđivanje diskriminacije radi naknada dežura i pripravnosti tužilaca, neisplaćene naknade za slučaj teže bolesti i za slučaj smrti bližnjeg člana porodice, utvrđivanje diskriminacije po osnovu isplaćivanja naknade za odlazak u penziju, poništenja rješenja po osnovu ocjene rada i slično. Preostali predmeti odnose se na zahtjeve kojim se potražuju naknade materijalne i nematerijalne štete radi

²³ Službeni glasnik BiH, broj 39/14, 59/22 i 50/24

²⁴ Podaci iz dostavljenih izvještaja iz Informacionog sistema e-nabavke

²⁵ Svi iznosi navedeni u tački 8. Javne nabavke su bez PDV-a.

²⁶ Poštanske usluge, usluge ekshumacije, hotelski smještaj u zemlji i inostranstvu

neosnovanog lišenja slobode, pretrpljenih duševnih, fizičkih bolova i straha, a koji su posljedica vođenja krivičnih postupaka.

Tužilaštvo je tuženo od strane 23 zaposlenika koja imaju status administrativno-tehničkog osoblja, v. sp. 490.358 KM, po osnovu diskriminacije i naknade štete. Sud Bosne i Hercegovine je u predmetnoj pravnoj stvari donio prvostepenu obavezujuću presudu²⁷ kojom je naloženo da se tužiocima izvrši isplata potraživanja sa zakonskim zateznim kamatama i troškovima postupka. Na navedenu presudu Tužilaštvo je putem zakonskog zastupnika Pravobranilaštva BiH izjavilo žalbu, po kojoj je donesena odluka Apelacionog vijeća Suda BiH²⁸ kojom je žalba uvažena i prvostepena presuda preinačena na način da se odbija tužbeni zahtjev. Protiv drugostepene presude Suda Bosne i Hercegovine izjavljen je vanredni pravni lijek te se odluka po istom čeka.

Iz svega navedenog može se zaključiti da je nastavljen kontinuitet tužbenih zahtjeva kojima zaposlenici Tužilaštva potražuju isplate naknada iz radnog odnosa. Realizacija sudskih presuda se vrši iz Budžeta institucija BiH, a realizuje ih Ministarstvo finansija i trezora BiH sa pozicije direktnih transfera.

²⁷ S1 3P 048118 24 P od 29.9.2025. godine

²⁸ Broj: S 1 3 P 048118 25 Gž od 12.2.2026. godine

11. KOMENTARI TUŽILAŠTVA NA NACRT IZVJEŠTAJA

Tužilaštvo je u ostavljenom roku dostavilo komentare na Nacrt izvještaja o obavljenoj finansijskoj reviziji za 2025. godinu. U dostavljenim komentarima Tužilaštvo je dalo osvrt po datim preporukama, bez dostavljanja novih činjenica ili dokaza koji bi uticali na promjenu nalaza i datih preporuka. Detaljno objašnjenje razloga neprihvatanja komentara Tužilaštva dato je u odgovoru Ureda za reviziju koji je dostavljen rukovodstvu Tužilaštva uz konačan izvještaj o obavljenoj finansijskoj reviziji za 2025. godinu.

Reviziju u Tužilaštvu za 2025. godinu obavili su: Nataša Pavlović – vođa tima, Ivona Beus – član tima, Darija Dandić – član tima, Sadržmir Teskeredžić – član tima i Jovana Jošilo – član tima.

**Vođa tima za
finansijsku reviziju**

Nataša Pavlović, v. r.

**Rukovodilac Odjela za
finansijsku reviziju**

Nermin Hamzagić, v. r.

Broj: 03-16-1-890/26

Prilozi

Prilog I – Pregled prihoda i primitaka za 2025. godinu

Prilog II – Pregled rashoda budžeta za 2025. godinu

Prilog III – Bilans stanja na 31.12.2025. godine

Pregled prihoda i primitaka za 2025. godinu

Tužilaštvo Bosne i Hercegovine

Opis	Planirani iznos u budžetu	Izmjene i dopune	Ukupno planirani iznos	Ostvareni iznos	Procenat (5/4*100)
1	2	3	4 (2+3)	5	6
1. Neporezni prihodi	0	0	0	28.596	
Prihodi od preduzetničkih aktivnosti i imovine i prihodi od pozitivnih kursnih razlika	0	0	0	0	
Naknade i takse i prihodi od pružanja javnih usluga	0	0	0	0	
Prihod od naplate premije osiguranja	0	0	0	2.732	
Prihod od refundacije bolovanja iz ranijih godina	0	0	0	3.980	
Ostali prihodi	0	0	0	21.884	
Novčane kazne (neporezne prirode)	0	0	0	0	
2. Tekući transferi i donacije	0	0	0	0	
Primljeni tekući transferi od stranih vlada i međunarodnih organizacija – donacije iz inostranstva	0	0	0	0	
Primljeni tekući transferi od ostalih nivoa vlasti	0	0	0	0	
Domaće donacije	0	0	0	0	
3. Kapitalni primici	0	0	0	0	
Kapitalni primici od prodaje stalnih sredstava	0	0	0	0	
Primici od finansijske imovine	0	0	0	0	
Primici od dugoročnog zaduživanja	0	0	0	0	
Primici od kratkoročnog zaduživanja	0	0	0	0	
4. Ukupni prihodi i primici (1+2+3)	0	0	0	28.596	

Pregled rashoda budžeta za 2025. godinu

Tužilaštvo Bosne i Hercegovine

Opis	Odobreni budžet	Usklađivanja budžeta	Ukupni budžet	Izvršenje budžeta	Procenat (5/4*100)
1	2	3	4 (2+3)	5	6
1. Tekući izdaci	22.268.000	370.035	22.638.035	21.640.328	96
Bruto plaće i naknade	18.924.000	-400.000	18.524.000	17.859.049	96
Naknade troškova zaposlenih	1.800.000	367.966	2.167.966	2.077.938	96
Putni troškovi	180.000	0	180.000	143.198	80
Izdaci telefonskih i poštanskih usluga	70.000	0	70.000	59.697	85
Izdaci za energiju i komunalne usluge	160.000	20.000	180.000	173.789	97
Nabavka materijala	120.000	0	120.000	116.496	97
Izdaci za usluge prijevoza i goriva	65.000	0	65.000	38.455	59
Unajmljivanje imovine i opreme	3.000	0	3.000	756	25
Izdaci za tekuće održavanje	80.000	102.069	182.069	173.679	95
Izdaci za osiguranje	16.000	0	16.000	10.676	67
Ugovorene i druge posebne usluge	850.000	280.000	1.130.000	986.596	87
2. Kapitalni izdaci	120.000	0	120.000	25.300	21
Nabavka zemljišta	0	0	0	0	
Nabavka građevina	0	0	0	0	
Nabavka opreme	117.000	0	117.000	22.300	19
Nabavka stalnih sredstava u obliku prava	3.000	0	3.000	3.000	100
Rekonstrukcija i investiciono održavanje	0	0	0	0	
3. Tekući grantovi	0	0	0	0	
	0	0	0	0	
	0	0	0	0	
4. Budžet-neposredna potrošnja (1+2+3)	22.388.000	370.035	22.758.035	21.665.629	95
5. Višegodišnja ulaganja projekata	0	0	0	0	
	0	0	0	0	
6. Novčane donacije	0	342.623	342.623	317.571	93
Unapređenje rada na predmetima ratnih zločina u BiH – IPA 2022	0	342.623	342.623	317.571	93
7. Programi posebne namjene	0	0	0	0	
	0	0	0	0	
8. Ukupno (4+5+6+7)	22.388.000	712.658	23.100.658	21.983.199	95

Bilans stanja na 31.12.2025. godine

Tužilaštvo Bosne i Hercegovine

Opis	31.12.2025.	31.12.2024.	Procenat (2/3*100)
1	2	3	4
1. Gotovina, krat. potraživanja, razgraničenja i zalihe	14.572	1.872	778
Novčana sredstva	3.052	1.015	301
Kratkoročna potraživanja	11.521	858	1.343
Kratkoročni plasmani	0	0	
Interni finansijski odnosi	0	0	
Zalihe	0	0	
Kratkoročna razgraničenja	0	0	
2. Stalna sredstva	3.338.834	3.417.979	98
Stalna sredstva	6.705.325	6.527.836	103
Ispravka vrijednosti	3.366.491	3.109.857	108
Neotpisana vrijednost stalnih sredstava	3.338.834	3.417.979	98
Dugoročni plasmani	0	0	
Dugoročna razgraničenja	0	0	
UKUPNO AKTIVA (1+2)	3.353.406	3.419.851	98
3. Kratkoročne obaveze i razgraničenja	350.337	2.034.792	17
Kratkoročne tekuće obaveze	326.672	317.848	103
Kratkoročni krediti i zajmovi	0	0	
Obaveze prema zaposlenima	9.321	1.565.789	1
Interni finansijski odnosi	0	0	
Kratkoročna razgraničenja	14.343	151.155	9
4. Dugoročne obaveze i razgraničenja	0	0	
Dugoročni krediti i zajmovi	0	0	
Ostale dugoročne obaveze	0	0	
Dugoročna razgraničenja	0	0	
5. Izvori sredstava	3.338.834	3.417.979	98
Izvori sredstava	3.338.834	3.417.979	98
Ostali izvori sredstava	0	0	
Neraspoređeni višak prihoda/rashoda	0	0	
UKUPNO PASIVA (3+4+5)	3.689.171	5.452.771	68

Napomena: Pravilnikom o finansijskom izvještavanju institucija Bosne i Hercegovine, čl.10. stav 4., napomenuto je da bilans stanja budžetskih korisnika **neće biti uravnotežen** (aktiva jednaka pasivi) zbog programski uspostavljenog sistema Glavne knjige, dok će bilans stanja koji radi Ministarstvo finansija i trezora na nivou Budžeta institucija Bosne i Hercegovine za tekuću godinu biti uravnotežen